

Il 15 d'avrel: Sontga Ludivina, purschala



Sontga Ludivina sa vegnir tenuta dils malsauns per spieghel da sontga pazienza sco antruras Job. Ella ei naschida a Schiedam en Hollandia. Il bab Pieder e la mumma Petronilla fuvan paupers da rauba denton zun rehs da buna veta. Els vevan otg fegls e sco novavel affon ei la feglia Ludivina naschida. Gia da pign ensi deva ella enzennas dad esser ina fideivla survienta da Diu. Cun siat onns ha la giuvnetta priu avon da buca semaridar, mobein da seconsecrar a Diu cun olma e

tgierp. Ella fugeva tuts passatemps dallas autras mattauns. Muort sia bellezza e las bialas vertids havess ella gia cun 15 onns survegni bunas letgas da semaridar, mo ella leva zun buca tedlar talas propostas. Perquei che sia bellezza fuva il motiv principal che targeva neutier muronzs, sche rugava ella Niessegner da schar vegnir ella schi macorta che negin miri pli sin ella. Diu ha tedlau sia damonda ed ha dau caschun da daventar in perfetg maletg dalla sontga pazienza.

Sin siu 15avel onn da naschientscha ha ella vuliu far in plascher a sias amitgas cun ir a spass cun ellas tier in'aua surtratga cun glatsch. Cheu era moda da lischnar ni ir en palas. Ludivina mirava tier sco ellas selischnavan sin quei glatsch. Mo ina da quellas ei fruntada cun tala forza encunter Ludivina ch'ella ei dada giu e rut ina costa. Ella vegn purtada a casa cun grondas dolurs. Negins miedis savevan gidar ella, era sch'il bab vess stuiu dar ora tut ses daners. Beinduras carschevan las dolurs taluisa ch'ella sesturscheva pil plaun entuorn sco in animal. Neginas medischnas levgiava il mal, anzi carschentavan quel aunc.

Trenta onns cuzzava quei pitir ed en quei temps haveva Ludivina buca magliau ton paun, sco in um en treis dis, haveva era buca durmiu dapli ch'in carstgaun en treis dis. Sia biala fatscha fuva vegnida pallida e macorta. Tier quei ha ella aunc survegni ina apostema en dadens ch'ei lu rutta ora e fatg treis ruosnas el venter. Ord quellas plagas vegnevan viarms neuado, gronds e macorts che tuts sesnuevan da mo mirar, schegie ch'els ferdavan buc. En certs loghens entscheveva la membra a smarschir.

Lu ei la malsogna, numnada il fiug da sogn Antieni vegnida a dies e consumau la carn schi fetg ch'ella veva mo pli la pial sin l'ossa. Il bratsch dretg cun la spatla fuva smarschius e tut sluccaus naven dalla giugadira. Il tgau pareva dad esser furaus cun siblas. Il frunt, ils eglis, ils dents, la gula, il baditschun e bunamein tut l'autra membra caschunavan dolorusas peinas. Perfin saung curreva ord buca, nas, eglis ed ureglias. Ord bucca spidava ella in'aua colorada da saung ch'ella saveva en in meins emplenir ina buot cun quell'aua. In egl veva ella lu piars e l'auter saveva ella buca arver, senza ch'il saung vegni. Il dir ed il lom smarschevan en dadens ch'ella freva ora entira tocca. La beglia vargava ord il venter veseivlamein. Il mal dil crap turmentava schi savens ch'ella perdeva la schientscha. Insumma: ei fuva buc in member che vess buca caschunau sias grevas dolurs.

En quei miserabel stan ch'ins savess numnar ina liunga e ruha mort, ha sontga Ludivina pudiu suffrir 38 onns, paupra, suletta e bandunada da tuts. Ina part glieud teneva ella per ina zun gronda pucconta che mereti quei castitg e mussavan negina cumpassiun e devan era negin agid. Inaga ha ella giu fatg rugar in reh um, sch'el dessi buc empau grass tgiel u caduscal per far in flaster. Il reh ha buca fatg quell'almosna, schegie ch'el veva semtgau ina massa caduscals per far ina gastaria. Mo silsunter eis el staus enriclaus, pertgei sil di dalla gastaria fuvan ils cots cun aunc auters utschals e gaglinam ch'el veva fatg mazzar, tuts marschs sco capiergnas.

Ils quater emprems onns haveva Ludivina giu bia plirau, bargiu, stada malpazienta e buca seschau confortar, cunzun cura ch'ella veseva sias cumpognas ad ir entuorn saunas e da buna veglia. Diu ha procurau ch'in pietus spiritual ei ius tier Ludivina e declarau ad ella sco sogns e sontgas vessien fatg per amur da Diu, co els hagien bandunau tuts deletgs, plaschers, rihezias, honors, casa, cuort, amitgs, parents e tuttas cumpignias da quest mund. Tgei ruhs e liungs marteris els hagien suffriu cun legherment e sco els selegrien ussa en la perpetnada cun engraziar e ludar Diu ch'el hagi dau ad els la caschun da pitir, per puder contonscher la gloria dil parvis. Mo particularmein di quei augsegner Joannes Pott ch'ella duessi rentar siu cor vid il cruzifix e savens patertgar tgei ch'il Retg dils marteris hagi endirau per nus.

El ha era purtau la sontga communion e lu detg: entochen ussa meditavel jeu la passiun da Cristus, mo ussa cun visitar, spisgentar e consolar tei, plaida Cristus sez. Strusch veva la schuaha purschala udiu quels plaids, ha ella bargiu duront 15 dis senza puder retener las larmas. Daleudenvi seconfortava la sontga cun meditar la passiun da Cristus e rugava da buca prender naven, mobein carschentar sias dolurs. Ella scheva: Sche jeu savess vegnir sauna cun in salidada, sche fagess jeu buca quei. Cun patertgar vid il marteri da Jesus Cristus eis ella daventada pazienta e sontga ch'ella fageva en siu travigliu stan miracas.

Sia mumma miera denton e per gidar ella tier la beada gloria, ha Ludivina schenghegiu ad ella tut quei ch'ella veva meritau entras sias miserias, dolurs, plagas, oraziuns, vigelgias ed auters acts da sontgadat. Encuntercomi per era metter senza enzatgei dil bien ord sia voluntad, ha la sontga ligiau sia tschenta da seitlas entuorn veta e tratg en il ruh cilizi sil tgierp plagau e purtau quei tochen la mort. Ord carezia pils auters ha ella vendiu las paucas mobillas che sia mumma veva schau anavos e dau ils daners als paupers.

Muort sia paupradad e siu miserabel stan, survegneva ella liberalas almosnas da buna glieud. Mo ella partgeva ora tut als paupers e duvrava per sesezza zun nuot. Sia buorsa numnava ella: la buorsa da Jesus, pertgei en quella fageva ella metter ils daners d'almosnas. Quels duvrava ella per vieuas, orfans, pelegrins e malsaus. Quella buorsa vegneva mai vita, era sch'ella predeva ora dapli che quei che vegneva anen. In toc carn ch'ella veva survegniu, ha ella fatg cuer e spisgentau silsunter 30 famiglias, senza sminuir il toc en la vanaun. Vegnend ella dumandada sco quei seigi pusseivel, ha Ludivina rispundiu: Quei fa il Segner, el ha gie detg: Dumandei, sche vegn ei dau era a vus!

Era sche Ludivina stueva star pli che 30 onns zuppada en letg, sche derasava ella sias bialas vertids lunsch entuorn e targeva neutier dabia buna glieud da mintga stan. Ella ei vegnida visitada da contessa Margreta da Hollanda, da Jannes duca dil Pejerland e dad autras enconuschentas personas che schavan leu grondas almosnas, aschia ch'ella veva da gidar auters paupers. Pieder, il bab da sontga Ludivina che fuv vegls, paupers e pudeva buca

gudignar pli siu paun, leva buca esser dependents dallas almosnas da sia feglia, scheva che quell'as seigien da saung e s'audien als auters paupers. Muort tala pietad e zarta cunscienza ha Diu provediu che quei um vegl retscheveva mintg'onni da Guglielm, cont dalla Hollanda, tut quei ch'el duvrava per viver.

Tier esser pazienta, fuvu Ludivina aunc fetg humiliteivla e selegrava dad esser sbittada da quest mund per saver lavar giu la cuolpa e meritar ton pli la gloria dil parvis. Ina da sias quinadas fuvu zun nauscha cun Ludivina, murmignava, scheva macorts plaids e spidava schizun en fatscha, senza che la sontga malsaua vess selamentau. Sin la damonda, pertgei ch'ella hagi tonta pazienza, ha ella rispundiu: Per tei, sina quei che ti semigliuries e vegnies buca pli furiosa. Il devozius spiritual Joannes Pott mava sco confessur beinduras a visitar ella, sia feglia spirituala. Mo nauschas buccas mettevan ora quei en mal e schevan ch'ella fussi ina buedra, pitauna, magliadrina e bestia. Tut quei suffreva Ludivina per amur da Diu, deva a tuts buns mussaments sco sedepurtar cun plaids e metter els sin la via dil parvis, schend: Buca il liug, mobein la veta fa sogns il carstgaun!

Diu ha visitau questa schubra spusa cun specialas grazias e favurs. Da quei restava Ludivina schi consolada ch'ella teneva siu dolorus letg per in palaz da retg, siu cilizi per ina custeivla tschenta, sias plagas da marscha per pedras, las dolurs per deletgs, las larmas per dultscha bubronda, ils viarms per pèrlas preziasas ed ils turments per emperneivlas rosas. Ella vegneva era savens visitada da siu aunghel pertgirader che plidava cun ella veseivlamein e palesava caussas tschelladas.

Cul spèrt vegneva la sontga menada en tschiel, el purgateri, egl uffiern, a Gerusalem, a Ruma ed en auters loghens sogns. Da quei saveva ella discuorer, sco ei passi en mintga liug: il bien dil parvis, las peinas digl uffiern e dil purgateri. Buca mo siu bien aunghel, mobein era Cristus sez ei cumpariu pli che ina ga e mussau ad ella in tschuppi da bialas flurs, semtgau per siu purschaladi e sia liunga pazienza. Plinavon ha Cristus stampau sias plagas el tgierp da Ludivina, per ch'ella senti las dolurs da siu divin spus. Quell'as plagas fuvan igl emprem veseivlas, mo suenter ha ella rugau Diu da prender naven ellas e schar sentir mo las dolurs. Quei fuvu daventau circa entuorn ils 17 onns da siu pitir.

Cura che la sontga veva talas visiuns celestialas, vegneva siu tgierp tarlischonts, il letg e la combra devan giu in fried marveglius da balsam. Cun il pli pign sbagli ch'ella commetteva restava ella privada dalla conversiun famigliara cun ils spèrts dil parvis. Mo per quei ch'ella veva bargiu per in da ses frars che fuvu morts, semussava il tschiel meins favoreivels per consolar ella. In eremit ha purtau las novas dalla mort da siu bab ed ella ha reteniu il bargir per siu bab. Ord quei savein nus capir che Diu vul che nus seigien ad el perfetgs survients.

Ei mass aunc ditg da vuler notar tuttas visiuns, revelaziuns e favurs che questa pazienta purschala ha gudiu dil tschiel en sia dolorosa malsogna. Ella veva il dun da profetisar, saveva enconuscher ils puccaus zuppai dils auters ed era volver biars pucconts tier la penetienza. Per converter in stinau puccont ha la sontga cussegliu da scher ina notg en in letg lom da plemas senza semuentar ni seruchegiar. Il puccont ha ris giudlunder ha auncallura acceptau quei cussegl ed empruau, mo giu tontas difficultads e breigias ch'el ha tertgau: sch'in letg lom ei per ina suletta notg dirs e ruhs, sche co vegns ti a puder vertir da star egl uffiern ni purgateri? Cun patertgar quei eis el ius en sesez, ha midau veta e fatg vera penetienza. Diversas personas dumandavan ella per agid en lur travaglias e denter quell'as fuvu era in

canoni regular. La sontga purschala ha rugau Niessegner da dar al canoni quei che seigi nizeivel per il salit da si'olma. Quei canoni veva ina vusch dultscha, clara e resunonta, mo tras l'oraziun da sontga Ludivina eis el vegnius raucs e piars totalmein la vusch. Quei ha Diu schau daventar, perquei ch'el veva avon cun sia sonora vusch survegniu la vanagloria e stridava cheutras Diu. Mo tras l'oraziun da sontga Ludivina han era biars survegniu la sanadad.

Essend la sontga purschala stada empruada cun cuntinuadas malsognas e dolurs duront 38 onns, sc'in aur el fiug, ha Diu finalmein schau saver ella sin tgei di ch'ella sappi murir. Ella roga per perdun tut quels ch'ella ha sin ina moda u l'autra offendiu. Vegnend neutier la fiasta da Pastgas ei sia combra la sera avon daventada clara e Cristus ei cumparius cun sia sontga mumma Maria, ina cumpignia d'aunghels ed era ils apostels. Cristus conforta ella ed unscha cun in étg zun marviglius che deva aunc l'auter di giu in fried celestial. Il tierz di suenter Pastgas fuva Ludivina persula en combra cun siu petschen nevs. Cheu fageva ella nuot auter che urar. Denton creschan las dolurs aschi fetg ch'ella stueva better si ina materia verda e pudend ella dil fleivel buca pli fierer si quei, eis ella spartida.

Quei fuva ils 14 d'avrel 1433. Siu nevs ha fatg canera ch'il confessur ei vegnius aunc cun autras persunas en combra ed anflau ella leu morta. Igl ei stau ina sontga mort, pertgei il tgierp che fuva duront sia veta staus macorts e plein plagas, fuva uss sauns e bials cun fatscha sereina e legreibla. Il tschiel ha revelau a diversas persunas che si'olma seigi ida enta parvis cun solemnidad. Sontga Ludivina ei vegnida satrada en la baselgia parochiala da sogn Gion Battesta, nua che biaras miracles ein daventadas. Siu cilizi u tschenta surveva per scatschar ils demunis.

Reflexiun

Gl'ei guess che tuttas malsognas vegnan tarmessas als carstgauns dil maun da Diu per lavar ils puccaus ni castitgs merital, ni per dar caschun da praticar pli bein las bunas vertids e da carschentar ils merets. Per ch'il carstgaun corrispundi alla finamira dil buntadeivel Diu fa ei da basegns, sco sogn Paul di, da haver ina sontga pazienza per cumplenir la veglia da Diu e contonscher las empermischuns da Cristus. Ina megliera medischina eis ei buca d'anflar che la pazienza da vuler endirar tut per l'amur da Diu. Per urbir ora da Diu tala vertid ei nuot pli nizeivel e fortificont ch'igl exempel da Jesus Cristus per nus cruzifigaus. Sogn Pieder di: Cristus ha endirau per nus e schau anavos in exempel per che nus suondien ses pass.

Co duess in pazient buca suffierer las malsognas, considerond che siu divin Salvader ha pitii ton ditg e bia per nus? Sontga Ludivina ha empruau quei e restada leutras bein consolada en sia liunga e dolorosa malsogna. Il cruzifix avon ils egls dil malsaun, duei survir ad el sco cudisch da leger e per patertgar co Cristus ha stuiu pitir. Lu vegn il mal buca a far mal, mobein dar confiart e legherment. Ribad. e Cochem.